

Guangjisi Minzcu Bau

ganhhau: CN45-0036 B.2019 Nd.4 Ng.3 liggaeuq geijhah nienz ndwengeih ngeihbet

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3368期

Namzingz Deihdiet 3 Hauh Sienq Haeujdaengz Seiz Dauqsuenq Yinh Hek Si Minzcunghveij (Minzyijveij) Daengz Dieg Cazyawj Hong Yungh Sawcuengh

Mboengqneix, Namzingz deihdiet 3 hauh sienq sawq hai ci byouq, hauh'ok Namzingz deihdiet 3 hauh sienq haeujdaengz duenh "seiz dauqsuenq" yinh hek, yawhsuenq yaek youq bineix ndwen 6 cingqsik yinh hek. Vih guh ndei hong hagsib senhconz caeuq gvancez doeksaed 《Aen Diuzlaeh Saw Vah Minzcuz Vunznoix Gvangsiah Bouxcuengh Swcigih》 hengzguh hopbi ndeu, haeujlaeg gvancez doeksaed 《Banhfap Guenjieix Ndwbiengz Yungh Sawcuengh Namzingz Si》, vih Cunghvaz Yinzminz Gunghozgoz laebbaenz 70 hopbi cauh ok gij heiqlaenh saw vah minzcuz ndei, ndwen 3 ngoenz 26,

Namzingz Si Minzcunghveij (Minzyijveij) cingj Cungguek Minzcuz Yijvwnz Fanhyizgiz, hoizsaemj ngeih gaep Sawcuengh, boux veicangj Gvangsiah Minzcuz Yijvwnz Yozvei Gvanh Swgingh gapbaenz aen cuj lauxhangz, daengz dieg cazyawj hong hwnjguh yungh Sawcuengh mizgven baizgeiqhauh dazroen deihdiet 3 hauh sienq.

Ciuq cam rox, 3 hauh sienq gunghcwngz geiz nduj 23 aen camhci cungj ciuq 1 hauh sienq, 2 hauh sienq youq baizcamh ndaw camh, baizdou haeujok rog camh, saeudazroen 500 mij rog camh, diveih dieg haeujok daengj baizgeiqhauh dazroen daengj

yungh Sawcuengh, seizneix baizcamh ndaw camh gaenq cang sat, mbangj camh baizdou haeujok rog camh, saeudazroen 500 mij rog camh, diveih dieg haeujok hix cang sat, lij miz dingznoix cang caengz sat. Gij cang sat hoeng miz gij vwndiz dajveh Sawcuengh guh baiz mbouj gveihfan, aen cuj cazyawj dangciengz daezok cingjaij yigen; gij baizgeiqhauh dazroen caengz cang sat, aen cuj cazyawj genyi danvih hwnjguh daezhawj dozgauj dajveh yungh guh saemjhaed dawzgvn, baujmaenh yungh deng Sawcuengh.

(Veiz Yinjsenz)

Gunghcwngz: Bouxcoz Suigiz Soengq Suivu Cihsiz Daengz Mbanjyauz



Ndwen 3 ngoenz 30, Gunghcwngz Yauzcuz Swciyen Suivugiz haiguh aen hozdung saedguh vwnzmingz seizdaih moq, gaemdawz seiz Gyahvei Cin Mbanjswanh banh ngoenzciet hozdung minzsuz bangrenz vut gungz gung-geng, guh daengz bangfuz caeuq bang dungxaiz dox giethab, cujiz bouxgagnyienh bouxcoz bae daengz aen mbanj neix haiguh aen hozdung senhconz sougvaeh "mehmbwk soengq rumzcin", ndaej daengz beixnuengx Yauzcuz dangdieg haenh. Ndaw doz dwg bouxgagnyienh senhconz suivu cihsiz hawj beixnuengx Yauzcuz.

(Cwng Ciminj/郑智敏)

Hagdangz Yizcouh Gih Fatyienz Caeuq Swnjcienz Vwnzva Bouxcuengh

Vih fatyienz caeuq swnjcienz vwnzva Bouxcuengh, mboengqneix, Hozciz Si Yizcouh Gih Saedniemh Siujyoz caeuq Aen Hagdangz Saedniemh Song Saw Vah Bohlanj Lozdungh Cin Yizcouh Gih doengzcaez haiguh aen hozdung cawjdaez hamj hagdangz hwnjdangz.

Gyoengq lauxsae hagseng Aen Hagdangz Saedniemh Song Saw Vah Bohlanj ndang daenj buhvaq minzcuz gyaundeidei moqsag, lauxsae hamj hagdangz hwnjdangz haenx hwnj dangzgoq sonhag caeuq minzcuz vwnzva mizgven ndeu hawj gyoengq hagseng. Gyoengq hagseng angqvauvau

caeuq lauxsae guhcaemz, roxyiuj le haeuxnaengj haj saek, aendomq, fouxsaux, aennyenz daengj minzsuz vwnzva. Mwh hwnjdangz, lauxsae son hagseng veh gyaenqding, veh gij byaek mak daegsaek Guengjsae. Gyoengq hagseng youq aen gyaenq veh doz le, couh doxdub gyaenqding angqyangz dangqmaz. Ndaw ransonsaw Aen Hagdangz Saedniemh Song Saw Vah Bohlanj, gwnz cauhsangz nauhyied raixcaix, sing riu mbouj dingz mbouj duenh, gyoengq lauxsae hagseng doenggvaq eu fwen, veh gyaenqding, dwkdomq, diuq fouxsaux daengj minzsuz hozdung, youq hag vwnzva

cihsiz doengzseiz, roxyinh gij yinx-daeuz "sam nyied sam Bouxcuengh" ngoenzciet cienzdoengj.

Boux yaucangj Aen Hagdangz Saedniemh Song Saw Vah Bohlanj naeuz, dangguh aen hagdangz saedniemh Cuengh Gun song saw vah, aen hagdangz neix coglaeng yaek haiguh engq lai hozdung miz minzcuz daegsaek, hawj hagseng roxyiuj gij fungsug Bouxcuengh, fatyienz caeuq swnjcienz vwnzva Bouxcuengh, haenq-rengz cauhsaen aen hagdangz miz minzcuz daegsaek.

(Dwng Yinzcauh)

SIUSIK DINJ

● Vih fatyienz, swnjcienz gij vwnzva Ywdoj, cienzdoh gij eiqsik Ywdoj ciengxndang cangqheiq, mboengqneix, Aen Yihyen Ywdoj Nazboh Yen bae daengz Nazboh Yen Daihngieih Siujyoz haiguh aen hozdung "vwnzva Ywdoj haeuj hagdangz", senhconz gij cihsiz Ywdoj cangqheiq caeuq yawj bingh nem camcaz cangqheiq hawj gyoengq lauxsae hagseng.

(Luz Ciyungz)

● Geij bi neix daeuj, Lingzyinz Yen gaenjndaet hopheux gij moegbiu "daezsang gij naengzlig vwnzlaig gungzhoj gag hwnghat ndaej vut gungz laisou", yungh hwnjlaeb aen gihci ciengzseiz lienzgiet leih'ik canjniieb cinjcing banggungz guh cawjsienq, laebdin daengx yienh diuz lienh canjniieb hwnghat banggungz daegsaek canjniieb, gyamaenh daezswng cienzdoengj canjniieb, haenq-rengz gungganq daegsaek canjniieb, coicaenh daengx yienh vunzguhnaz laisou, saedyienh cinjcing vut gungz.

(Veiz Fucwngh)

● Ndwen 3 ngoenz 29, Dava Yauzcuz Swciyen youq Suijan Gunghyenz banh hozdung "doiq hamq eu fwen". Canghfwen Bouxcuengh dangdieg ndang daenj buhvaq minzcuz moqsag doxcomz giz ndeu doiqfwen, gangjok gij cingzngieih minzcuz beixnuengx Bouxcuengh, caeuq lwgminz Bouxcuengh gyaenzmaij byadah gyaundeidei, guhbaenz fuk ciengzmienh nauhyied gig miz minzcuz daegsaek ndeu.

(Vuz Mingzyangh)

● Ndwen 3 ngoenz 27, Dunghlanz Yen Lauzdung Siujyoz cujiz daengx hagdangz ca mbouj geijlai 3000 boux hagseng haiguh aen hozdung hagdangz minzcuz vwnzva nem minzcuz doxgiet cinbu gyauryuz, angqcoux cietndei "sam nyied sam Bouxcuengh". Hozdung yungh "sam nyied sam Bouxcuengh · huzndei youq Betgveiq" guh cawjdaez, hozdung neiyungz lai mizyinx, miz langhbaij guh gijgwn ndei, dwkdomq caeuq roq aennyenz daengj vwnzva dijjuz hozdung hanghmoeg gig miz minzcuz daegsaek.

(Veiz Luzdungh)